

APPELLAT Horizontem spheræ obliquæ artificialem, eam forte ob causam, quod admodum variabilis existat. Horizon etenim spheræ rectæ, cum transeat per utrumq; mundi polum, videtur per sese, & quodammodo naturaliter spheram diuidere: Nam hoc pacto sortitur spheræ directum & propriū situm, neq; talis Horizon vnq; variari potest, vt aliqui habere possint Horizontem magis rectum, alij minus rectum: At vero in Horizonte spheræ obliquæ, cum non transeat per polos mundi, sed supra ipsum semper alter attollatur, alter sub ipso deprimatur, oblique videtur collocari spheræ, & non naturaliter. Accedit etiam, quod Horizon spheræ obliquæ pro arbitrio, & voluntate hominum habitantium in terra variabilis propemodum infinitis modis existit; Quo enim magis ad polum quis accedit, eo magis obliquum Horizontem habeat necesse est. Quare non immerito Horizon obliquæ spheræ quodammodo artificialis appellari potest, vt distinguatur contra Horizontem spheræ rectæ, qui quasi naturalis est ipsi spheræ; Cui. n. in ipso vterq; mundi polus existat, videtur naturaliter in ipso spheræ moueri.

OBLIQUAM Spherā alij definiunt dicentes, eam esse, in qua alter polorum mundi supra Horizontem eleuatus eminet, alter infra Horizontem decumbit & subsidit: Vel, in qua Aequinoctialis cum Horizonte angulos efficit, & conformat obliquos, obtusum quidem eum, qui polum exaltatum respicit, acutum vero, qui ad polum vergit occultum. Spheram obliquam nacti sunt omnes inhabitantes Europam, vt sunt Hispani, Galli, Itali, Germani, Græci, Poloni, & maior pars Africæ, & India occidentalis, nec non tota Asia.

NON SOLVM Spheræ, verum etiam orbis, seu Mundus; Itē Horizon, Finiensue, seu Finitor ab auctoribus dici solet rectus & obliquus. Solent nāq; dicere, Germanos, Italos, Gallos, & Hispanos habitare in orbe obliquo: Pari ratione Horizontem, seu Finitorem, mundum, vel spheram illos habere obliquam, &c.

QUOD si quis interroget, qualem spheram dicantur habere ij, qui directe sub polis habitant; respondendum erit, eos ex auctoris sententia habere spheram obliquam. Nam licet eorum Horizon, cum sit idem prorsus cum Aequinoctiali, nullo modo eum secet, quare nec ad rectos, nec ad obliquos angulos; tamen alter polorum ipsis maxime extollitur, alter vero maxime deprimitur; Vnde ex hac parte maxime obliquam spheram habere censendi erunt. Non desunt tamen, qui eos